

Lozi - Agape Mañolo - God's Love Letter Scriptures

Joani 15:9 Na mi lata sina mw'a ni latela Ndate. Mu ine mwa lilato la ka.

Isaya 43:1 Isilaele, Muñ'a Bupilo ya ku bupile u li, "U si ke wa saba. Ni ta ku sileleza. Ni ku bizize ka libizo la hao. U wa ka!

Jeremia 1:5 "U si ka fiwa kale bupilo ne ni ku supile. Mi u si ka pepwa kale na ku sumekela. Na ku keta ku ba mupolofita wa macaba."

Joani 15:16 Ha si mina mu ni ketile. Kono ki na, ni mi ketile ni ku mi supa kuli mu y'o beya miselo ye miñata, miselo ye ka ina. Mi Ndate u ka mi fa se mu ka kupa ku yena kaufela ka libizo la ka.

3 Joani 1:2 Mulikan'a ka, ni ku lakaleza kuli lika kamukana li ku lukele, ni kuli u pile hande mwa mubili sina ha ni ziba kuli u pila hande ni mwa moyo.

Isaya 43:4 Ni ta tuhela macaba kamukana kuli ni ku pilise, kakuli u wa butokwa ku na, mi na ku kuteka, na ku lata.

Jeremia 31:3 Mi na bonahala ku bona ni li kwahule. Batu ba Isilaele, ni mi latile ka nako kamukana, cwale ni sa zwelapili ku mi bonisa lilato la ka le li sa feli.

Hosea 11:8 "Ni ta ku lisela cwañi, Isilaele? Ne ni ka kona ku ku sinya cwañi? Kana ne ni ka ku timeza sina mo ni ezelize Edima, kamba ku ku eza sina mo ni ezelize Zeboimi? Pilu ya ka ha i na ku ni lumelela ku eza cwalo! Lilato la ka ku wena ki le lituna hahulu.

Joani 3:16 Kakuli Mulimu u latile hahulu batu ba lifasi, mane u ba file Mwan'a hae wa libanda kuli mutu ufi ni ufi ya lumela ku yena a si ke a shwa, kono a be ni bupilo bo bu sa feli.

Isaya 49:15,16 Cwale Muñ'a Bupilo a alaba, a li, "Kana luli musali a ka libala mbututu wa hae mi a si ke a lata mwana y'a pepile, nji? Musali nih'a ka libala mwan'a hae, na, ha ni na ku libala ni kamuta. 16 Ha ni koni ku libala, Jerusalema. Ni ñozi libizo la hao mwa lingandi za mazoho a ka.

Isaya 41:13 Ki na Muñ'a Bupilo, Mulimu wa mina. Ni tiisa maata a mina, mi ni mi bulelala, ni li, 'Mu si ke mwa saba. Ni ta mi tusa.'

Mateu 28:20 Mu ba lute ku mamela ze ni mi laezi kaufela. Haili na, mu zibe kuli ni ta ba ni mina ka mazazi kaufela, mane ku isa kwa mafelelezo a lifasi."

Joani 14:1 Jesu a ba bulelala, a li, “Mu si ke mwa filikana. Mu lumele ku Mulimu ni ku na cwalo.

Isaya 41:14 Muñ'a Bupilo u li, “Niha mu li ba banyanyani, ba ba fokola, Isilaele, mu si ke mwa saba. Ni ta mi tusa. Na, Mulimu ya Kenile wa Isilaele, ki na ya mi pilisa.

Isaya 43:2 Ha u fita mwa buliba, ni ta ba ni wena. Manyando a hao h'a na ku ku tula. Ha u ta fita mwahal'a mulilo, ha u na ku ca. Miliko ye tata ye ta ku tahela ha i na ku ku kataza.

Lipina 23:1-6 Muñ'a Bupilo ki mulisan'a ka. Ha ni na ku tokwa se siñwi. 2 U ni pumuliseza mwa mafulelo a mwengelele o mutala, mi u ni isa kwa masa a mezi a kuzize. 3 U ni fa maata a manca. U ni zamaisa mwa linzila ze lukile, sina mw'a sepiselize. 4 Nzila yeo niha i ka fita mwa lififi le linsu, ha ni na ku saba, Muñ'a Bupilo, kakuli wena u zamaya ni na! Mulamu wa hao ni lusata lwa hao ki zona ze ni babalela. 5 U ni ezeza mukiti wa lico, fapil'a lila za ka kamukana. U ni amuhela sina muenyi ya kutekeha mi u taza komoki ya ka, mane ya yuboka. 6 Ni ziba kuli bunde ni lilato la hao li ta ba ni na, mwa bupilo bwa ka kaufela. Mi ni ta pila mwa ndu ya Muñ'a Bupilo kuya kuile.

Joani 14:27 “Ni mi siyela kozo, ni mi fa kozo ya ka. Ha ni mi fi yona sina mo ba fela ba lifasi. Mu si ke mwa filikana, mi mu si ke mwa saba.

BaFilipi 4:7 Mi kozo ya Mulimu, ye fita kutwisiso ya mutu, i ta buluka lipilu za mina ni minahano ya mina ku Jesu Kreste.

Mashitanguti 3:24 Ha u na ku saba ha u y'o lobala, mi u ta lobala hande busihu kaufela.

Lipina 4:8 Ni sa patama feela, ni itobalela ka kozo. Ki wena feela u nosi, Muñ'a Bupilo, ya ni fa buiketo.

Lipina 33:18 Muñ'a Bupilo u talima ba ba mu saba, ili ba ba sepile lilato la hae la kamita.

BaRoma 5:2 Ka yena Jesu lu konile, ka tumelo, ku sutelela kwa sishemo sa Mulimu ko lu yemi ka nako ye. Mi lu tabile cwale, kabakala sepo ye lu na ni yona, ya ku y'o ina mwa kanya ya Mulimu.

Isaya 55:12 “Mu ta zwa mwa Babilona ka tabo. Mu ta zwiswa mwa munzi ka kozo. Malundu ni malundunyana a ta opela, mi likota li ta huweleza ka tabo!

Joani 16:22 Ki mona mo ku inezi ni ku mina. Ka nako ye mu swabile, kono ni ka mi bona hape, mi lipilu za mina li ka tala tabo, tabo ye mu si ke mwa i amuhiwa ki mutu.

Luka 12:9 Kono ya ka ni latula patalaza, ni na, Mwan'a Mutu, ni ta mu latula

fapil'a mangeloi a Mulimu.'

Mateu 10:30 Haili ka mina bo, mane ni milili ya kwa litoho za mina i balilwe kamukana.

Isaya 54:10 Malundu ni malundunyana a ka ululuka, kono lilato la ka, le ni ku lata ka Iona, ha li na ku fela. Sepiso ya ka ya kozo ni ta i buluka kuya kuile." Ki mw'a bulelela Muñ'a Bupilo ya ku lata.

Mateu 11:28-30 "A mu tahe ku na, mina kaufela ba ba katalisizwe ki milwalo ye bukiti, mi ni ta mi katulusa. 29 Mu nge joko ya ka, mu itwese yona, mi mu itute ku na kakuli ni na ni musa, ni wile pilu, mi mu ta fumanela mioya ya mina pumulo. 30 Joko ya ka i bubebe, mi mulwalo wa ka ha u na bukiti."

**Pina ya Lipina 2:10 Wa lilato u bulela ni na. Taha cwale, mulatiwa wa ka.
Wa lilato, a lu ye kaufela.**

Hosea 2:14,19,20 Cwale ni ka mu isa mwa lihalaupa hape, mi ni ka y'o mu shemba-shembela mwateñi, ni ku mu kutisa ka manzwi a lilato. 19 Isilaele, ni ka ku eza musal'a ka. Ni ka ba ni niti ni ku sepahala ku wena. Ni ta ku bonisa musa ni lilato le li sa feli, mi u ka ba wa ka kuya kuile. 20 Ni ta buluka sepiro ya ka, mi wena u ka ba wa ka. U ka ziba kuli ki na Muñ'a Bupilo.

Mututo 3:14 Mulimu a li ku Mushe, "Ki na Ya li teñi, Muñ'a Bupilo. S'o swanezi ku bulelela Maisilaele ki se, u li, 'Ya li teñi, Muñ'a Bupilo, u ni lumile ku mina.' "

Hosea 13:4 Muñ'a Bupilo u li, "Ki na Mulena Mulimu wa mina, ya mi zwisize mwa Egepita. Ha mu na Mulimu u sili, haisi na feela. Ki na feela mupilisi wa mina.

Joani 15:14 Mina mu balikani ba ka, haiba mu eza ze ni mi laela.

Sinulo 3:20 Utwa! Ni yemi fa munyako, mi na ngongota. Haiba mutu a utwa linzwi la ka, mi a kwalula sikwalo, ni ta kena mwa ndu ya hae, ni y'o ca ni yena, mi ni yena u ta ca ni na.